



Salmo 22 (23)

Karidade

Ita hotu hatene salmu 22 (23): “Na’i ha’u-nia Bibi-Atan di’ak”... ita hatene knananuk 3 ka 4 husi salmu ida ne’e, ita repete beibeik, ita hatene katak Dom Bosco gosta Bibi-Atan Di’ak nu’udar modelu ba ninia karidade. Oras ne’e, ita hakarak hakle’an no reza salmu ida ne’e ne’ebé bele fó inspirasaun ba ita-nia atividade pastorál nu’udar animadór sira.



Na’i ha’u mahein, ha’u la kuran buat ida,
halo ha’u hakmatek iha fatin kmook,
lori ha’u ba bé matan di’ak,
haraik kbiit mai ha’u isin.

Lori ha’u ba dalan di’ak atu hahí Nia naran.
Liu hosi nakukun, ha’u la ta’uk:
Maromak ho ha’u, tahan ha’u nafatin.

Iha ema aat sira oin, Na’i tau mesa ida naresin.
Tau mina santo iha ha’u ulun,
ha’u kaliz nakonu to’o suli.
Na’i nia laran luak tahan ha’u,
iha ha’u nia moris tomak.
Ha’u sei hela iha Na’i nia kadunan
iha ha’u nia moris tomak..



ATU KOMPRENDE DI’AK LIUTÁN

Salmu ida ne’e uza ilas rua ne’ebé fasil liu ba povu Israel atu komprende: bibi-atan no bainaka. Biblia gosta uza ilas bibi-atan nian tanba povu Israel moris iha sivildade agrikula, simples, ne’ebé fó folin boot ba bibi sira. Bibi-atan sira nia moris kesi metin ba bibi sira ninian: sira troka hela fatin konforme du’ut ne’ebé presiza ba bibi sira, sira buka dalan hodi hanoin se bibi sira bele liu ka lae, sira la’o ho aitonka atu bele defende bibi sira husi balada fuik sira. Profeta barak ko’alia kona-ba Maromak hanesan Bibi-Atan ne’ebé fó atensaun boot ba Ninia bibi sira (Kf: Ez 34; Hos 4,16; Jer 23,1; Mi 7,14; Is 40,10; 49,10; 63,11).

Nune’e, mós, ema ne’ebé moris simples fó valór boot ba ospitalidade; bainbain sira ne’ebé kiak liu mak hatene fó degrasa. Iha salmu, bele komprende Maromak nia “ospitalidade” liuhusi aspetu tolu: tau mesa ida naresin, tau mina santo, kaliz nakonu to’o suli. Salmu ida ne’e liga verbu tolu atu dehan katak Maromak prepara buat ruma furak liu, festa ida ne’ebé sei manán terus hotu. Povu Israel uza mesa no kaliz la’ós de’it nu’udar simbolu festa nian, maibé mós ba seremonia sagrada.

Ho fraze finál, salmista hakarak hametin liután ideia katak nia relasaun ho Maromak sei metin ba nafatin, maski liu husi susar no terus oinoin.



HAMUTUK HO JEZÚS

Tanba Jezús moris iha intimidade ho Ninia Aman, bainhira nia reza salmu ida ne’e, ne’ebé povu Israel reza dala barak, iha sentidu kle’an liu. Ita bele mós koko atu reza salmu ida ne’e, ho hakmatek, hodi hanoin Jezús hanoin saida karik?

Dala ruma, iha ninia moris, Jezús apresenta an nu’udar bibi-atan ne’ebé hadomi ninia bibi sira (kf Jo 10,11) no mós haktuir aiknanaik kona-ba bibi ida ne’ebé lakon ne’ebé hatudu katak Maromak nia domin mak pesoál, hanoin ba ema ida-idak, hatene ida-idak nia presiza no ba ida-idak iha hahalok la hanesan (kf Mt 18,12). Nune’e, se profeta sira iha Antigu



Testamentu, ko'alia kona-ba Maromak nu'udar Bibi-Atan, Jezús, iha ninia moris, hatudu bibi-atan nia estilu ne'ebé Maromak hakarak.

Sarani sira dahuluk nian reza salmu ida ne'e ba adultu sira ne'ebé foin simu Batizmu iha kalan Paskua nian: "lori ha'u ba bé matan di'ak" reprezenta Batizmu ne'ebé sira simu ona, hafoin sira hakbesik fatin iha ne'ebé sei simu Krisma ("Tau mina santo iha ha'u ulun") molok sira bele simu Jezús Eukaristia ba dala uluk ("Na'i tau mesa ida naresin").

Sira reza nune'e atu hafoun sira nia fiar katak Jezús de'it mak Bibi-Atan di'ak ne'ebé bele halo ema hetan ksolok no moris hakmatek.



ITA-NIA MORIS

Dom Bosco propoin ilas Bibi-Atan di'ak nian ba sira hotu ne'ebé hakarak eduka labarik no foin-sa'e sira, tan ne'e, ba ita, animadór sira, salmu ida ne'e bele fó inspirasaun ba ita-nia hahalok apostoliku. Dala barak, iha ita-nia atividade oratóriu nian, ita hetan susar ka difikuldade: maski ita prepara didi'ak ita-nia atividade, dala ruma oratorianu sira la hatudu interese ba buat ne'ebé ita apresenta; dala ruma, oratorianu sira nia hakarak la la'o ho proposta oratóriu nian, dala ruma iha labarik no foin-sa'e sira ne'ebé parese gosta koko ita-nia pasiénsia... no bele aumenta lista ida ne'e!

Atu bele sai bibi-atan di'ak, ita rasik presiza konxiente katak Jezús mak Bibi-Atan di'ak ba ita, Nia sei la husik ita iha difikuldade laran, maibé hatene gia ita. Tan ne'e mak importante hametin relasaun ho Maromak: bainhira ha'u konxiente katak, hamutuk ho Jezús, "buat ida sei la kuran", ha'u sei sai edukadór ne'ebé iha atensaun no hakaran atu oratorianu sira sei la kuran buat ida!

Ho salmu ida ne'e, Maromak husu mai ita atu kria kondisaun sira atu ita-nia oratorianu sira bele hala'o sira-nia moris nu'udar festa ida, iha ne'ebé buat hotu sei "naresin".



HA'U HAKEREK FALI SALMU

Tinan ruma liu ba, Amo Bispo ida halibur foin-sa'e sira ne'ebé serbisu nu'udar animadór ka edukadór atu sira hamutuk bele prepara foin-sa'e sira nia Sinodu. Nia husu ba sira atu hala'o atitude 6 iha fulan sira ne'ebé prepara event u ida ne'e, maibé ita bele aplika ba ita-nia oratorianu sira:

1. Observa: hateke didi'ak ba oratorianu sira no deskobre sira hakarak saida? Sira buka saida?
2. Rona: la'ós de'it buat ne'ebé sira husu ho liafuan sira, maibé mós rona oratorianu sira nia "harohan" ne'ebé sa'e husi sira nia fuan no dala barak la espresa ho liafuan sira.
3. Evanjeliza: iha situasaun hotu-hotu haka'as an atu haree buat ne'ebé di'ak, buat ne'ebé loos hodi deskobre fini Evanjellu nian iha oratorianu sira-nia moris.
4. Harohan: la to'o atu rona ka halo buat ruma ba oratorianu sira, animadór loos ida mak ida ne'ebé hatene reza ba sira!
5. Korije: n'udar edukadór ita presiza berani atu korije buat ne'ebé la loos, buat ne'ebé lori ita-nia "bibi sira" iha nakukun laran hodi gia sira ba Maromak nia dalan
6. Dixerne: atu la'o ba oin ka halo saida, presiza hatene nafatin Maromak nia planu... ne'ebé dala barak susar atu komprende. Tan ne'e animadór ida presiza buka beibeik Maromak nia hakaran.

Attitude 6 ne'e, bele sai dalan ida atu sai bibi-atan di'ak ba oratorianu sira: ida-idak koko atu haree saida mak nia presiza hametin liutan no... hahú halo!

